

Kes HFMD di Johor meningkat 6.8 kali ganda kepada 640 kes setakat 7 Mei
Astro Awani
13 Mei 2022
Bernama

JOHOR BAHRU: Kes penyakit tangan, kaki dan mulut (HFMD) di Johor dilaporkan meningkat sebanyak 6.8 kali ganda bagi tempoh 1 Jan hingga 7 Mei tahun ini berbanding tempoh sama tahun lepas.

Pengerusi Jawatankuasa Kesihatan dan Perpaduan Johor Ling Tian Soon berkata sehingga Minggu Epid 18/2022 (yang berakhir 7 Mei), sebanyak 640 kes HFMD telah dilaporkan berbanding 94 kes pada tempoh sama pada 2021.

Beliau berkata peningkatan itu dijangka berlaku pada tahun ini ekoran kelonggaran prosedur operasi standard (SOP), bagaimanapun situasi masih terkawal memandangkan bilangan itu adalah rendah berbanding situasi praCOVID-19 iaitu 1,015 kes pada tempoh yang sama 2019.

"Di Johor, kebanyakan kes HFMD berlaku dalam kalangan kanak-kanak berumur 0 hingga enam tahun iaitu sebanyak 614 kes (96 peratus) diikuti oleh kumpulan umur tujuh hingga 12 tahun iaitu 22 kes (tiga peratus) dan selebihnya berumur lebih daripada 13 tahun.

"Sehingga kini, sebanyak 24 wabak HFMD dilaporkan dengan daerah tertinggi Johor Bahru (10), diikuti Kluang (enam) dan Kota Tinggi, Kulai serta Segamat masing-masing dua wabak manakala satu kes masing-masing di Batu Pahat dan Tangkak dengan majoriti penularan berlaku di taska iaitu 17 wabak," katanya dalam kenyataan, di sini, malam tadi.

Beliau berkata memandangkan kebanyakan penularan berlaku di institusi penjagaan kanak-kanak, Jabatan Kesihatan Negeri Johor (JKNJ) ingin menegaskan agar semua pengusaha institusi perlu mengambil langkah berjaga-jaga seperti yang digariskan bagi mengurangkan risiko jangkitan terhadap kanak-kanak.

-- BERNAMA

© 2022 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/kes-hfmd-di-johor-meningkat-68-kali-ganda-kepada-640-kes-setakat-7-mei-361107>